


舊五代史

自十九
至四



	一	漢
	二	書
	三	門
二	〇九	
〇	一二四	
冊	架	函
號	類	

內閣文庫		
二	一	漢
函	二九	書
五	〇四	
架	冊	號
類		

內閣文庫		
番號	漢	1294
冊數	20(4)	
函號	281	10

四



四本

十九之廿四九六卷

十九 氏叔琮 朱友恭 王重師 朱珍 李思安 鄧季筠 黃文靖 胡規 李謹 李重元

范居實

廿 謝瞳 司馬鄴 劉捍 王敬堯 高劭 馬嗣勳 張存敬 寇彥卿

一 龐師古 霍存 符道昭 徐懷玉 郭言 李唐賓 王虔裕 劉康乂

王彥章 賀德倫

二 楊師厚 牛存節 王檀

三 劉鄩 賀瓌 康懷英 王景仁

四 李珽 盧曾 孫騰 張儁 張衍 杜荀鶴 羅隱 仇殷 段深

舊五代史卷十九

宋

薛

居

正

等

撰

庫

梁書第十九

列傳九

氏叔琮尉氏人也唐中和末應募為騎軍初隸于龐師古為伍長叔琮壯勇沈毅膽力過人太祖討巢蔡于陳許間叔琮奮擊首出諸校太祖壯之自行伍間擢為後院馬軍都將時東伐徐鄆多歷年所叔琮身當矢石奮不顧命觀者許焉累遷為指揮使尋奏授許州刺史檢校右僕射太祖伐襄陽叔琮失利降為陽翟鎮遏使尋又捍禦晉軍于洹水有功遷曹州刺史天復元年春領大軍攻拔澤潞叔琮遂引兵北掠太原師還除晉州節度使明年太祖屯軍于岐下晉軍潛襲絳州前軍不利晉軍恃勝攻臨汾叔琮嚴設

舊五代史

卷十九 列傳

一

梁書

備禦乃于軍中選壯士二人深目虬鬚貌如沙陀者令就襄陵縣牧馬子道間蕃寇見之不疑二人因雜其行間俄而伺隙各擒一人而來晉軍大驚且疑有伏兵遂退據蒲縣時太祖遣朱友寧將兵數萬赴應悉委叔琮節制既至諸將皆欲休軍叔琮曰若然則賊必遁矣遁則何功焉因夜出潛師截其歸路遇晉軍遊騎數百盡殺之遂攻其壘拔之斬獲萬餘衆奪馬三百匹太祖聞之喜謂左右曰殺蕃賊破太原非氏老不可叔琮乃長驅牧汾州與晉人轉戰直抵并壘軍迴以其功奏加檢校司空自後累年晉軍不敢侵軼叔琮養士愛民甚有能政天復三年為鄜州留後尋真領保大軍節度使檢校司徒及昭宗東遷徵為右龍虎統軍以衛洛陽天祐元年八月與朱友恭同受太祖密旨弒昭宗于大內既而責以軍政不理貶白州司戶諱賜自盡叔琮將死呼曰賣我性命欲

塞天下之謗其如神理何乾化二年詔許歸葬

朱友恭壽春人本姓李名彥威卯角事太祖性穎利善體太祖意太祖憐之因畜為己子賜姓初名克讓後改之時初建左長劍都督射乾寧中授汝州刺史加檢校司空光化初淮夷侵鄂渚武昌帥杜洪來乞師太祖遣友恭將兵萬餘濟江應援引兵至龍沙九江而還軍聲大振時淮寇據黃州友恭攻陷其壁獲賊將瞿章俘斬萬計途經安陸因襲殺刺史武瑜盡收其衆以功為潁州刺史加檢校司徒天復中為武寧軍留後天祐初昭宗東遷洛邑徵拜左龍虎統軍以衛宮闕尋與氏叔琮同受太祖密旨弒昭宗于洛陽宮既而太祖自河中至責以慢于軍政貶崖州司戶復其本姓名與氏叔琮同日賜死

北夢瑣言云朱全忠請誅朱友諒氏叔琮以成濟之罪歸之友諒臨刑誅天曰天若有知他日亦當如我後全忠即位為子友

王重師穎州長社人也材力兼人沈嘿大度臨事有權變劔稍之

註所弒竟如其言案友諒當作友恭見後攷證

卷一十九

二

補遺山房

妙冠絕于一時唐中和末蔡寇陷許昌重師脫身而來太祖異其狀貌乃隸于拔山都每于軍前効用頗出儕類文德中令董左右長劔軍太祖伐上蔡重師力戰有功及討兗鄆擢為指揮使奏授檢校右僕射重師枕戈擐甲五六年于齊魯間凡經百餘戰由是威震敵人尋授檢校司空為穎州刺史乾寧中太祖攻濮州縱兵壞其墉濮人因屯火塞其壞壘煙焰亘空人莫敢越重師方苦金瘡臥于軍次諸將或勉之乃躍起命壯士悉取軍中氈罽投水中擲于火上重師然後率精銳持短兵突入諸軍踵之濮州乃陷重師為劔槊所傷身被八九創丁壯荷之還營且將斃矣太祖驚惜尤甚曰雖得濮壘而失重師奈何亟命以奇藥療之彌月始愈尋

知平盧軍畱後加檢校司徒其後北伐幽滄鎮定屢與晉軍接戰頗得士心故多勝捷天祐中授雍州節度使加同平章事數年治戎卹民頗有威惠開平中為劉捍所搆太祖深疑之然未有以發其事無何擅遣裨將張君練縱兵深入邠鳳君練敗北太祖聞之怒其專擅因追而斬之

通鑑云劉捍至長安王重師不為禮捍請之帝曰重師潛與邠岐通甲中貶溪州刺史尋賜自盡夷其族

朱珍徐州豐縣雍鳳里人也太祖初起兵珍與龐師古許唐李暉丁會氏叔琮鄧季筠王武等八十餘人以中涓從摧堅陷陣所向盪決及太祖鎮汴兼領招討使署珍為宣武右職以總腹心于是簡練軍伍裁制綱紀平巢破蔡多珍之力也始尚讓以驍騎五千人至繁臺珍與龐師古齊奉國等擊退之及黃巢敗珍與并帥李克用追至窈旬而還尋從太祖以汴宋毫之師入西華破王夏寨勇冠軍鋒以功加秩光啓元年署諸軍都指揮使始為上將于是

五代史

卷十九列傳

三

王重師

軍焦夷敗蔡師鐵林三千人盡俘其將復西至汝鄭南過陳穎繚
宋毫滑濮間與蔡賊交戰鏖伏襲殺不知其數會滑州節度使安
師儒戎政不治太祖命珍與李唐賓率步騎以經略之始入境遇
大雪令軍士無得休息一夕馳至壁下百梯竝升遂乘其墉滑州
平時太祖方謀濟師乃遣珍往淄州募兵行次任縣東面都統齊
克讓伏兵于孫師陂以邀珍珍大破之進軍至牙山都虞候張仁
遇白珍曰軍有不齊者當先斬本都將後以狀聞願許之珍怒其
專乃斬仁遇以徇軍由是諸將感懼兵至乾封與淄人戰于白草
口敗之青人以步騎二萬列三寨于金嶺驛珍與戰連破之殲其
師盡獲軍器戎馬是夕攻博昌大獲兵衆其後破盧塘張晔及朱
瑄朱瑾之衆平定曹濮未嘗不在戰中梁山之役始與李唐賓不
協珍在軍嘗私迎其室于汴而不先請太祖疑之密令唐賓察之

二將不相下因而交諍唐賓夜斬關還汴以訴珍亦棄軍單騎而
至太祖兩惜之故不罪俾還于師復以踏白騎士入陳毫間以邀
蔡人遂南至斤溝破淮西石璠之師二萬擄璠以獻珍旋師自毫
北趣靜戎濟舟于滑破黎陽臨河李固三鎮軍于內黃敗樂從訓
萬餘人分命聶金范居實略澶州與魏師遇于臨黃魏軍有豹子
軍二千人戮之無噍類威振河朔復攻淮西至蔡夾河而寨敗賊
將蕭皓之衆皆擁于河溺死之進軍蔡州營其西南旣破羊馬垣
遇雨班師珍以兵援劉瓚赴楚州至襄山南遇徐戎扼其路珍乃
攻豐下之時溥乃以全師會戰于豐南吳康里珍乃收豐破其三
萬餘衆及蔡賊平珍比諸將功居多龍紀初與諸將屯于蕭縣以
禦時溥珍慮太祖自至令諸軍葺馬廐以候巡撫李唐賓之裨將
嚴郊獨慢焉軍候范權恃珍以督之唐賓素與珍不協果怒乃見

以訴其事珍亦怒曰唐賓無禮遂拔劍斬之珍命騎列狀陳其事
 太祖初聞唐賓之死驚駭與敬翔謀詐令有司收捕唐賓妻子下
 獄以安珍心太祖遂徑往蕭縣距蕭一舍珍率將校迎謁梁祖令
 武士執之責其專殺命丁會行戮都將霍存等數十人叩頭以救
 太祖怒以坐牀擲之乃退

李思安陳留張亭里人也初事汴將楊彥洪為騎士性拳勇未弱
 冠長七尺超然有乘時自奮之意唐中和三年太祖鎮汴嘗大閱
 戎旅觀其材甚偉之因錫名思安字貞臣思安善飛稍所向披靡
 每從太祖征伐常馳馬出敵陣之後測其厚薄而還或敵人有恃
 猛自衒者多命取之必鷹揚颯卷擒馘于萬眾之中出入自若如
 蹈無人之地太祖甚惜之命副王虔裕為踏白將時巢蔡合從太
 祖每遣偵邏必先獨往巢敗走思安領所部百餘人追賊殺戮

掩奪眾莫敢當尋領軍襲蔡寇于鄭都將李唐賓馬躓而墜思安
 援槊刺追者唐賓復其騎而還又嘗與蔡人鬪當陣生擒賊將柳
 行實其後渡長淮下天長高郵二邑又拒孫儒迫濠州皆有奇績
 累遷為諸軍都指揮使奏官至檢校左僕射尋拜亳州刺史練兵
 禦寇邊境肅然思安為性勇悍每統戎臨敵不大勝必大敗開平
 元年春率兵伐幽州營于桑乾河擄獲甚眾燕人大懼及軍迴率
 諸軍伐潞累月不克師人多逸太祖怒甚詔疏其罪盡奪其官爵
 委本郡以民戶係焉踰歲起之復令領兵亦無巨績可紀太祖嘗
 因命將授鉞謂左右曰李思安當敵果敢無出其右者然每遇藩
 方擇材吾將用之則敗聞必至如是者二三矣則知飛將數奇前
 史豈虛言哉乾化元年秋又以為相州刺史思安自謂當擁旌仗
 鉞及是殊不快意但日循晏安無意為政及太祖北征以候騎之

誤落然無所具而復壁壘荒圯祭廩空竭太祖怒貶柳州司戶尋


賜死于相州通鑑開化元年丙午至相州刺史李思安不意帝降至落然無具坐削官爵二年正月丁卯帝至獲嘉追思李思安去歲供饋有闕貶柳州司戶尋長流思安

于崖州賜死

鄧季筠宋州下邑人也少入黃巢軍隸于太祖麾下及太祖鎮汴首署為牙將主騎軍伐鄆之役生擒排陣將劉矯以獻唐大順初唐帝命丞相張濬伐太原太祖奉詔出師西至高平與晉人接戰軍既不利季筠為晉人所擒克用見之甚喜釋縛待以賓禮俄典戎事季筠在并門凡四稔景福二年晉軍攻邢臺季筠領偏師預其役將及邢邢人陣于郊兩軍酣戰之際季筠出陣飛馬來歸太祖大加獎歎賞資甚厚時初置廳子都最為親軍命季筠主之旋改統親騎又遷將中軍天祐三年奏授登州刺史下車稱理登州舊無羅城及季筠至郡率丁壯以築之民甚安之因相與立碑以

頌其績太祖受禪改鄭州刺史尋主兵于河中為都指揮使時并人寇平陽季筠接戰于洪洞大克拜華州防禦使又繼領龍驤等諸軍騎士累官至檢校司空柏鄉之役季筠臨陣前却太祖亦未之罪乾化二年春太祖親伐鎮定駐于相州因閱馬怒其馬瘦與魏博軍校何令稠陳令勳同斬于纛下

黃文靖金鄉人少附于黃巢黨中巢敗歸于太祖累署牙職繼遷諸軍指揮使從太祖南平巢蔡北定兗鄆皆有功唐大順中佐葛從周送朱崇節入潞會晉軍十餘萬近逼垣寨文靖慮孤軍難守乃與葛從周啓闔出師文靖為殿命矢刃皆外向持重而還晉人不敢逼其年冬與康懷英渡淮入壽春之境下安豐霍邱至光州而還光化初晉將李嗣昭周德威寇于山東文靖佐葛從周統大軍禦之至沙河敗晉軍五千餘騎遂逐之越張公橋乃止後旬日



復與晉人戰于邢州之北擒蕃將賁金鐵慕容滕李存建等百餘人奪馬數千匹尋以功表授檢校左僕射耀州刺史天祐二年春命佐楊師厚深入淮甸越壽春侵廬江軍至大獨山遇淮夷殺五千餘衆振旅而還改蔡州刺史加檢校司空又遷潁州刺史太祖受禪復爲蔡州刺史入爲左神武統軍又改左龍驤使乾化元年從太祖北征因閱馬得罪命斬之文靖驍果善戰諸將皆惜之

胡規兗州人初事朱瑾爲中軍都校兗州平署爲宣武軍都虞候佐葛從周伐鎮定從張存敬收晉絳皆有功署爲河中都虞候權鹽務天復中太祖迎駕至岐下以規權知洽州昭宗還長安詔授皇城使及東遷以爲御營使駕至洛授內園莊宅使天祐三年佐李周彝討相州獨當州之一面頗以功聞軍還權知耀州事明年討滄州爲諸軍壕寨使太祖受禪除右羽林統軍尋佐劉鄩統兵

收潼關擒劉知浣獻之乃以爲右龍虎統軍兼侍衛指揮使乾化元年詔修洛河堤堰軍士因之斬伐百姓園林太甚河南尹張宗奭奏之規得罪賜死

李讜河中臨晉人少時遊秦雍間爲人勇悍多力甚有氣誼唐廣明初黃巢陷長安讜遂得仕于其間巢以讜爲內樞密使蓋讜會委質于宦者出入于宮禁間巢以此用焉其後巢軍旣敗讜乃束身歸于太祖署爲左德勝騎軍都將從太祖討蔡賊頗立軍功及東伐兗鄆以所部士伍俘獲甚衆改元從騎將表授檢校右僕射柳王友裕領兵攻澤州時太祖駐大軍于盟津乃令讜將兵越大行授以籌謀讜頗違節度久而無功太祖遣追還廷責其罪戮之于河橋

李重允宋州下邑人狀貌雄武初在黃巢黨中推爲剛鷲唐中和

四年五月同尚讓李讜等率衆至繁臺與太祖之軍相拒及巢寇
漸衰乃率衆來降太祖素識之拔用不次署爲先鋒步軍都頭與
胡眞援河陽逼懷州重允以部下兵突之射中蕃將安休休又令
與李讜率騎軍至陝應接郭言迴次澠池破賊帥黃花子之衆改
滑州夾馬指揮使蔡賊圍汴重允以步兵攻下三寨擄獲甚多太
祖大舉伐宗權俾重允以滑兵爲先鋒及東討徐州下豐蕭二邑
轉右廂馬步軍指揮使大順元年秋從郴王友裕收澤州與晉軍
戰于馬牢川王師收績迴守河陽太祖謂諸將曰李讜重允違我
節度不能立功頗辜任使于是與李讜並戮于河橋

范居實絳州翼城人事太祖初爲隊將從討巢蔡有功又從朱珍
收滑州改左廂都虞候預破寇聊功遷感義都頭鄭州馬軍指揮
使幽州劉仁恭舉衆南下寇魏郡北闔居實與葛從周張存敬率

兵救魏大破幽滄之衆于內黃太祖迎昭宗于岐下以居實爲河
中馬軍都指揮使及昭宗還京賜迎鑾毅勇功臣遙領錦州刺史
又遷左龍驤馬軍都指揮使從征淮南迴改登州刺史轉左神勇
軍使開平元年用軍于潞州命居實統軍以解澤州之圍授耀州
刺史令以郡兵屯固鎮尋除澤州刺史居實拳勇善戰頗立軍功
在郡以戎備不理詔追赴闕暴其翫寇之罪而斬之
史臣曰叔琮而下咸以鷹犬之才適遇雲龍之會勤勞王室踐履
將壇然俱不得其死豈不惜哉得非烏盡弓藏理當如是耶將梁
祖之雄猜無漢高之大度歟乃知自古帝王能保全功臣者惟光
武一人而已矣語曰弑父與君亦不從也而叔琮友恭從之何也
旣爲盜跖所噬豈免成濟之誅臨終之言益彰其醜也

劉益益謂祖烈豈不為之精調錄之言益璋其願也
近一人而曰突謂曰赫文與等亦不為也而外崇文恭翁之願也
願之無益無幾高之大吏煥曰朕自古帝王前全也曰昔昔
孫歷然以不特其取豈不計其非息盡曰蘇歷當以景和深榮
史曰曰外崇而不以謝天之本應也深藉之會德榮王室親
亦謂以力崇不歷也其則舉其禮家之罪而神之
陳史合以洲其由固應持制戰陳史其實卒與海輝立軍也
軍史開平元年甲軍于繼州命司實孫軍以神戰州之圍到
又遷立前魏軍時計戰史於五世南國也登州陳史轉立轉更
中謂軍時計戰史又即宗豐京顯也變葬更也引發前論陳史
吳妹陵大姬幽命之梁干內黃太師也即宗干劫下以司實為

舊五代史卷十九攷證


梁列傳九氏叔琮傳太祖伐襄陽叔琮失利 案舊唐書光化元
年汴將氏叔琮陷趙匡疑之隨唐鄧等州是書趙匡疑傳亦云
太祖遣氏叔琮伐之匡疑懼乞盟是役也實以勝歸而叔琮本
傳獨言失利未知所據

令就襄陵縣牧馬于道間 案襄陵原本作襄陽今據歐陽史改
正

貶白州司戶 案舊唐書作貝州
與氏叔琮同日賜死 案此宋友恭事是書及歐陽史通鑑俱同

北夢瑣言作友諒誤
王重師傳潁州長社人也 潁州歐陽史作許州

太祖異其狀貌乃隸于拔山都 案拔山原本作技山歐陽史作



拔山攷當時軍旅皆以都名如黑雲都銀槍都效節都橫街都之類今從歐陽史改正并增入都字

朱珍傳敗樂從訓萬餘人 案通鑑作樂從訓來告急遣都指揮使朱珍等分兵救從訓與此傳異

李重允傳于是與李讜並戮于河橋 案原本脫與字今增入

范居實傳與葛從周張存敬率兵救魏 案原本脫從字今增入

舊五代史卷二十

宋

薛

居正

等

撰

梁書第二十

列傳十

謝瞳字子明福州人唐咸通末舉進士因畱長安三歲不中第廣明初黃巢陷長安遂投跡于太祖泊居門下未嘗一日不在左右及太祖據同州遂署右職其年秋太祖與河中交戰再不利連上章請兵于巢偽右軍都尉孟楷抑而不進瞳揣太祖有擇福意乃進說曰黃家以數十萬之師值唐朝久安人不習戰因利乘便遂卜兩京然始竊偽號任用已失其所今將軍勇冠三軍力戰于外而孟楷專務壅蔽奏章不達下為庸才所制無獨斷之明破亡之兆必矣況土德未厭外兵四集漕運波注日以收復為名惟將軍

察之太祖曰我意素決爾又如是復何疑哉翼日遂定策戮偽監
軍使悉衆歸順于河中王重榮表曠爲檢校屯田員外郎賜緋令
奏表于蜀唐僖宗大悅召入顧問錫賚甚厚以功授朝散大夫太
子率更令賜紫爲陵州刺史治郡一歲改檢校右散騎常侍通刺
史在任四考頗有政績秋罷詣蜀行在太祖遣人迎之龍紀二年
至東京勞來彌厚賜第墅各一區錢千緡表爲亳州團練使兼太
清宮副使加檢校工部尚書是年冬太祖征淮南過郡因求侍府
幕表爲宣義軍節度副使充兩使留後曠在滑三十年部內增戶
約五萬益兵數千人累遷至大中大夫檢校右僕射卒于滑開平
初追贈司徒

司馬鄴字表仁其先河內温人也祖德璋仕唐爲杞王傅父譚左
武衛大將軍鄴資蔭出身頗知書累官至大列唐天福初韓建用
爲同州節度留後昭宗之幸鳳翔也太祖引兵入關前鋒至左馮
翊鄴持印鑰迎謁道左太祖以兵圍華州命入城招諭韓建建果
出降及大軍在岐下遣奏事于昭宗再入復出又使于金州說其
帥馮行襲俾堅攀附後歷宣武天平等軍從事開平元年拜右武
衛上將軍三年使于兩浙時淮路不通乘驛者迂迴萬里陸行則
出荆襄潭桂入嶺自番禺泛海至閩中達于杭越復命則備舟楫
出東海至于登萊而揚州諸步多賊船過者不敢循岸必高帆遠
引海中謂之入陽以故多損敗鄴在海逾年漂至耽羅國一行俱
溺後詔贈司徒

劉捍開封人父行仙宣武軍大將捍少爲牙職太祖初鎮夷門以
捍聰敏擢副典客唐中和四年夏太祖以朱珍爲淄州刺史令收
兵于淄青間命捍監其兵路逢大敵皆破之入博昌獲精兵三萬

以歸四月合大軍敗蔡賊秦宗賢數萬衆于汴西文德元年十一月蔡將申叢折宗權足納款于太祖使捍奏其事加兼御史大夫光化三年六月太祖北伐鎮定至常山而王鎔危懼送款于太祖命捍入壁門傳諭時兩軍未整守門者戈戟千匝捍馳騎而入竟達其命又移師以攻中山至懷德驛大破定人五萬衆王處直乞降捍復單馬入州安撫而迴太祖迎昭宗于岐下以捍爲親軍指揮天復三年正月朱文通令客將郭啓奇使于太祖命捍復命昭宗聞其至卽召見詢東兵之事仍以錦服銀鞍勒馬賜之翼日授光祿大夫檢校司空登州刺史昭宗還京改常州刺史賜號迎鑾殺勇功臣四月太祖伐王師範于青州改左右長直都指揮使天祐三年正月授宋州刺史四月加檢校司徒太祖受禪授左龍虎統軍兼元從親軍馬步都虞候及上黨繹兵太祖親往巡撫以捍

爲御營使大軍次昂車斥候來告蕃戎逼澤州命捍以兵千人赴之并軍遂遁車駕還京授捍侍衛親軍都指揮使晉人侵晉州從幸陝迴加檢校太保及從駕幸河中詔追王重師赴行在以捍爲雍州節度觀察畱後纔踰月劉知俊據同州反潛使人以厚利啗捍將校遂爲部下所執送于知俊知俊繫捍歸于鳳翔爲李茂貞所害開平四年贈太傅末帝卽位又贈太尉捍便習賓贊善于將迎自司賓局及征討四出必預其間雖無決戰爭鋒之績而承命奔走敷揚命令勤幹涖職以至崇顯焉

王敬蕤潁州汝陰人世爲郡武吏唐乾符初敬蕤爲本州都知兵馬使中和初寇難益熾郡守庸怯不能自固敬蕤遂代之監郡俄眞拜刺史加檢校右散騎常侍時州境荒饑大寇繼至黃巢數十萬衆寨于州南敬蕤極力抗禦逾旬而退俄又宗權之衆凌暴益

甚合圍攻壁皆力屈而去蔡賊復遣將刁君務以萬衆來逼敬蕤
列陣當之身先馳突殺敵甚多由是竟全郡壘遠近歸附及淮人
不恭太祖屢以軍南渡路由州境敬蕤悉心供億太祖甚嘉之乾
寧二年署爲沿淮上下都指揮使四年冬龐師古敗于清口敗軍
逃歸者甚衆路出于潁時雨雪連旬軍士凍餒敬蕤自淮燎薪相
屬于道郡中設糜糗餅餌以待之全活者甚衆由是表知武寧軍
節度徐宿觀察畱後數月眞拜武寧軍節度使天復二年入爲右
龍武統軍天祐三年轉左衛上將軍開平元年八月以疾致仕尋
卒于其第敬蕤魁傑沈勇多力善戰所用槍矢皆以純鐵鍛就槍
重三十餘斤摧鋒突陣率以此勝雖非太祖舊臣而遠輸懇款保
境合兵以輔興王之運有足稱者

高劭字子將淮南節度使駢之從子也父秦黔中觀察使唐僖宗

避敵在蜀駢鎮淮南爲都統兼諸道鹽鐵使兵賊在已朝廷優假
之以故劭幸而早官年十四遙領華州刺史光啓中以駢命遏晉
公王鐸于鄭俄而州陷于蔡劭爲賊所得使人守之戒四門曰無
出高大夫劭伺守者稍惰佯爲乞食者過危垣取殍者衣全身易
服得他兒抱之行出東郊門人以爲丐者不之止及稍遠棄所抱
兒疾趨至中牟遂達于汴太祖以客禮遇之尋表爲亳州團練副
使知州事又數年辟爲宣武軍節度判官在幕下頗以氣直自許
後監鄭州事復權知徐州畱後唐昭宗之鳳翔太祖迎奉未出劭
有疑謀遂令赴華州詣丞相府以議其事行至高陵爲盜所害
馬嗣勳濠州鍾離縣人世爲軍吏嗣勳有口辯習武藝初爲州客
將唐景福元年三月太祖以壽州刺史江儒反下蔡鎮使李立率
兵攻濠梁刺史張遂俾嗣勳持州印籍戶口以歸于太祖乾寧二

年三月楊行密復攻濠州張遂遣嗣勳求援于太祖俄而郡陷嗣勳無所歸卽署爲元從押牙副典客頗稱任使光化元年三月太祖令往光州說刺史劉存背淮賊以向國又從李彥威復黃州及武昌縣獲刺史瞿章俄復使光州持幣馬以賜劉存會淮賊急攻光州存與嗣勳率兵大戰敗而走之又遣使于蜀及歸得其助軍貲實甚多天復中太祖迎昭宗于岐下軍至華之西闕使嗣勳入見韓建卽時同出迎謁及羅紹威將殺牙軍遣使告于太祖求爲外援時安陽公主初卒于魏太祖乃遣嗣勳率長直官千人實兵仗于橐中肩舁以入于魏聲言來致祭會葬牙軍不之覺天祐三年正月十六日夜嗣勳與紹威親軍同攻牙軍至署盡殲之嗣勳重傷旬日而卒開平中累贈太保

祖赴汴以其折節頗見親昵授爲右騎都將從討巢蔡凡歷百戰多于危蹙之間顯有奇略由是頻立殊效光啓中李罕之會晉軍圍張宗奭于盟津太祖遣丁會葛從周存敬同往馳救存敬引騎軍先犯敵將諸軍翼之敵騎大敗乃解河橋之圍大順二年爲諸軍都虞候佐霍存董大軍收宿州以功奏加檢校兵部尙書太祖東征徐克存敬屢有俘斬之功凡受指顧皆與機會矢石所及必以身先太祖屢加優異以爲行營都指揮使檢校右僕射乾寧三年充武寧軍留後行潁州刺史光化二年夏四月幽滄侵凌魏郡復以存敬爲都指揮使三年大舉與葛從周連統諸軍攻浮陽樹數十柵圍劉守文累月時幽州劉仁恭舉兵來援存敬潛軍擊之于乾寧軍南老鴉堤是日燕人大敗斬首五萬級生擒馬慎交已下一百餘人獲馬萬蹄其年秋九月引軍收鎮州存敬勒衆涉滹

沘河師人鼓行而進逢鎮之遊兵數千因逐之直入鎮之壘門收
鞍馬牛駝萬計翼日鎮人納質而旋尋爲宋州刺史踰年甚有能
政復擁衆伐薊門數旬間連下瀛莫祁景四州擒俘不可勝紀自
懷德驛與中山兵接戰枕尸數十里中山開壁請降天復元年春
太祖以河中節度使王珂與太原結親憑恃驕恣命存敬統大軍
討之卽日收絳州擒刺史陶建釗降晉州刺史張漢瑜二郡平進
圍河中王珂請降太祖嘉之乃以存敬爲護國軍留後未幾檢校
司空尋移宋州刺史將之任所寢疾踰旬卒于河中太祖聞之痛
惜移晷開平初追贈太保乾化三年又追贈太傅子仁愿晉天福
中仕至大理

寇彥卿字俊臣大梁人也祖瑄父裔皆宣武軍牙校太祖鎮汴以
彥卿將家子擢在左右弱冠選爲通贊官太祖爲元帥補元帥府

押牙充四鎮通贊官行首兼右長直都指揮使累奏授檢校司徒
領洛州刺史羅紹威將殺牙軍遣使告于太祖太祖命彥卿使于
魏密與紹威謀之竟成其事彥卿之力也彥卿身長八尺隆準方
面語音如鐘善騎射好書史復善伺太祖之旨凡所作爲動皆云
合太祖每言曰敬翔劉捍寇彥卿蓋爲我而生其見重如此太祖
有所乘烏馬號一丈烏嘗以賜彥卿天復中太祖迎昭宗于鳳翔
累與岐軍對陣時彥卿爲諸道馬步軍都排陣使嘗躬擐甲胄乘
其所賜烏馬馳騁于陣前太祖曰之曰真神王也昭宗還京賜迎
鑾毅勇功臣改邢州刺史尋遷亳州團練使

案通鑑開平二年帝從吳越王錢鏐之請以亳州團練使寇彥卿爲東南兩行營都指揮使擊淮南十一月彥卿率衆一千襲霍邱爲土豪朱景所敗又攻盧壽二州皆不勝淮南遺滁州刺史李儼拒之九國志朱景傳梁祖聞景名命寇彥卿率勁騎三千襲霍邱圍取景山諭梁祖之意令降景率其徒戰于邱墟林澤中射死者無數彥卿兵折力殫而去

太祖受禪爲華州節度使加檢校太保歲餘入爲左金吾衛大將軍充街使一日過天津橋有老

人誤衝其騶道者排之落橋而斃為御史所彈太祖不得已責授左衛中郎將不數月除相州防禦使依前行營諸軍排陣使未幾授河陽節度使加檢校太傅及太祖遇弒彥卿追感舊恩圖御容以奠之每因對客言及先朝舊事即涕泗交流末帝嗣位遙領興元節度使東南面行營都招討使以拒淮寇尋改右金吾衛上將軍貞明初授鄧州節度使會淮人圍安陸彥卿奉詔領兵解圍大破淮賊而迴四年卒于鎮時年五十七詔贈侍中彥卿貞幹明敏善事人主然怙寵作威多忌好殺雖顯立功名而猶為識者之所鄙焉

史臣曰案原本有闕文存敬有提鼓之勞彥卿遇攀麟之會俱為藩后亦其宜哉

舊五代史卷二十

舊五代史卷二十攷證

梁列傳十司馬鄴傳揚州諸步多賊船 諸步原本作諸走攷容

齋隨筆云步者水傍之名今改正

劉捍傳光化三年六月太祖北伐鎮定又移師以攻中山 案梁

祖下鎮定服中山舊唐書作光化三年九月新唐書作十月是

書總繫于六月據通鑑自六月舉兵至九月始定中山也

馬嗣勳傳刺史張遂 案新唐書作張璠


大祖令往光州說刺史劉存背淮賊以向國 案新唐書本紀乾

寧三年楊行密陷光州刺史劉存死之九國志柴再用傳乾寧

中從朱延壽平劉存于弋陽授知光州軍事梁兵寇光州再用

擊走之事俱與是書異

又從李彥威復黃州獲刺史瞿章 案全忠陷黃州新唐書作乾



舊五代史卷二十一
寧四年九國志作三年是書繫光化元年與諸史異
張存敬傳擒刺史陶建釗 建釗原本作建鉦今據通鑑改正

舊五代史卷二十一

宋 薛 居 正 等 撰

梁書第二十一

列傳十一

龐師古曹州南華人初名從以中涓從太祖性端愿未嘗離左右及太祖鎮汴樹置戎伍始得馬五百匹卽以師古爲偏將援陳破蔡累有戰功及朱珍以罪誅遂用師古爲都指揮使乃渡淮餉軍于廬壽攻滁州破天長下高郵沿淮轉戰所至克捷尋代朱友裕領軍攻下徐州斬時溥首以獻遂移軍伐兗州入中都寨于梁山敗朱瑄之衆襲至壘下又被朱瑄于清河從討汶陽與朱瑄朱瑾及晉將史儼兒戰于故樂亭大捷而迴乾寧四年正月復統諸軍伐鄆拔之擒其帥朱瑄以獻始表爲天平軍節度畱後尋授徐州

節度使官至檢校司徒乾寧四年八月與葛從周分統大軍渡淮以伐楊行密十一月師古寨于清口寨地卑下玉堂閒話云龐從會軍五萬于清口所屯之地蓋兵

書謂之絕地人不獨肩行一舍方至夷坦之處

或請遷移弗聽俄有告淮人決上流者曰水至矣

師古怒其惑眾斬之

九國志侯瓚傳時兵起倉卒加以陰寒士皆飲水餐雪而行甫及梁營則豎艾植足鬪志未決朱瑾與瓚率五十騎潛濟淮入自壘

北舞築而馳營雷沸梁兵皆殞眩不能舉遂斬龐從大將繼之死者大半

須臾我軍在淖中莫能戰而吳人襲焉

故及于敗師古沒于陣

霍存洺州曲周縣人性驍勇善騎射在黃巢中已為將領唐中和四年太祖大破巢軍于王滿渡時存與葛從周張歸霸皆自巢軍來降太祖宥而納之其後破王夏寨擊殷鐵林並在戰中尋佐朱珍取滑臺攻淄州取博昌皆預戰立功時蔡賊張晷在汴北存以三千人夕犯其營破之用本部騎兵敗秦賢軍殺五千人連破四寨盡得其輜重從討盧瑋張晷殲萬餘人存功居多我軍之圍濮

州也有賊升眺樓大詬太祖怒甚召存射之矢一發而尸隕其下

賞賚甚厚復佐朱珍擒石璠破魏師敗徐戎又佐龐師古至呂梁

敗時溥二千餘眾以是累遷官初王師渡淮乏食不甚利惟存軍

戰有功淮賊乃引退太祖之討宿州也葛從周以水壞其垣丁會

以師乘其墉存戰壘外敗其軍宿人乃降明年佐柳王友裕擊時

溥于碭山破之獲蕃將石君和等五十人

歐陽史云存代李唐賓攻時溥溥敗碭山存獲其將石君和等五十

人梁攻宿州葛從周引水浸之丁會與存戰城下遂下之是歲復與晉軍戰于馬牢川始入為前鋒出

則後拒晉不敢逼乃渡河襲淇門殺三千餘人曹州刺史郭紹賓

之來歸也存以師援之遂代其任始朱友裕以大軍伐鄆臨其壁

既而師陷圍中以急來告存領二百騎馳赴擊退之太祖喜拔為

諸軍都指揮使景福二年春太祖親至曹州畱騎軍數千存將

之且曰有急則倍道兼行以赴之俄聞朱瑾領兵二萬入援彭門

存乃領騎軍馳赴之與徐克之衆合戰于石佛山下大敗之存亦中流矢而卒時人稱其忠勇初朱珍李唐賓之歿龐師古代珍存代唐賓戰伐功績多與師古同始遙領韶州牧又改賀州後用爲權知曹州刺史官至檢校右僕射及太祖登極屢有征討因起猛士之歎一日幸講武臺閱兵謂諸將曰霍存在朕安有此勞苦耶諸君其思之他日語又如是累贈官至太保子彥威後唐明宗朝爲青州節度使

符道昭淮西人性強敏有武略秦宗權用爲心膂使監督諸軍後爲騎將尤能布陣勇聞于時然剛而無操善迎人意一見若盡肺腑必甚愛其才而道昭之心腹颺矣秦宗權之將敗也有薛潛者支孽隊伍道昭謂所私曰蔡弱矣乃歸潛潛欲敗復奔洋州依葛佐佐攻與元軍不利復奔于岐宋文通愛之養爲己子名繼遠遂

易其宗及得軍職悉超儕伍後爲巴州刺史又奏爲隴州防禦使兼中軍都指揮使太祖迎奉昭宗駐軍于岐下道昭頻領騎士敢鬪戰屢爲王師所敗遂來降太祖素聞其名待之甚厚昭宗反正奏授秦州節度使同平章事遣兵援送不克而還先是李周彝棄鄜州自投歸國署爲元帥府行軍左司馬寵冠霸府及道昭至以爲右司馬使與周彝同領寇彥卿南大豐閭寶已下大軍伐滄州及太祖幸魏州討牙軍中軍前有魏博將山河營指揮使左行遷聞府中有變引軍還屯歷亭自稱畱後從亂者數萬人道昭佐周彝與彥卿已下大破之殺四萬餘人擒左行遷斬之有史仁遇亦聚徒數萬據高唐又破之擒仁遇以獻乘勝取瀆博二州平之復殺萬餘人道昭性勇果多率先犯陣屢有摧矢而周彝彥卿掎角繼進連以捷告護兵者上功不實皆以道昭爲首太祖陰知之俱

不議賞及滄州之圍也不用騎士令道昭牧馬于唐陽太祖受禪後委兵柄與康懷英等攻潞州以蚰蜒塹繚之飛鳥不度既踰歲晉人援至王師大敗道昭為晉軍所殺

徐懷玉本名琮亳州雋夷縣人少以雄傑自任隨太祖起軍唐中和末從至大梁光啓初蔡寇屯金堤驛懷玉將輕騎連破之由是累遷親從副將改左長劍都虞候又從破蔡賊于板橋收秦宗權八寨奏加檢校右散騎常侍文德初同諸軍解河陽之圍復從破徐宿乾寧中奏加檢校刑部尚書太祖賜名懷玉破朱瑾于金鄉南擒宗江以獻表授金紫光祿大夫檢校右僕射乾寧四年龐師古失利于清口懷玉獨完軍以退光化初轉滑州右都押牙兼右步軍指揮使俄奏授沂州刺史頃之王師範以青州叛屢出兵侵軼懷玉擊退之天復四年轉齊州防禦使加檢校司空從大軍迎

駕于岐下歸署華州觀察畱後一年復領所部兵戍雍州尋召赴河中補晉絳同華五州馬步都指揮使天祐三年授左羽林統軍轉右龍虎統軍領六軍之士赴澤州尋為晉軍所攻晝夜衝擊穴地而入懷玉率親兵逆殺于隧中晉軍遂退開平元年授曹州刺史加檢校司徒明年除晉州刺史其秋晉軍大至已乘其墉懷玉選親兵五十餘人擁殺下城晉軍既退出家財以賞戰士歲中晉軍又至懷玉領兵敗之于洪洞三年制授鄜坊節度使特進檢校太保練兵繕壁人頗安之加檢校太傅乾化二年庶人友珪既篡立河中朱友謙拒命遣兵襲鄜州懷玉無備尋為河中所擄囚于公館及友珪遣康懷英率師圍河中友謙慮懷玉有變遂害之懷玉材氣剛勇臨陣未嘗折退平生金瘡被體有戰將之名焉郭言太原人也家于南陽新野少以力穡養親鄉里稱之唐廣明

中黃巢擁衆西犯秦雍言爲巢黨所執後從太祖赴汴初爲騎軍
繼有戰功後擢爲裨校言性剛直有權略勤于戎事或以家財分
給將士之貧者由是頗得士心屢將兵于蔡寇戰于浚郊每以少
擊衆出必勝歸太祖嘉其勇果謂賓佐曰言乃吾之虎侯也時宗
權支黨數十萬太祖兵不過數十旅每恨其寡與之不敵一日命
言董數千人越河洛趨陝虢招召丁壯以實部伍言夏往冬旋得
銳士萬餘遂遷步軍都將自是隨太祖掩襲蔡寇斬獲掠奪不可
勝紀宗權以茲敗北太祖盡收其地因命言將兵導達貢奉以安
邗傳自汴鄭迄于潼關去奸恤弱甚得其所光啓中唐天子以太
祖兵威日振命兼揚州節度使太祖遣幕吏李璠領兵赴維揚以
制置爲名時言爲李璠前鋒深入淮甸破盱眙而還梁祖東伐徐
鄆言將偏師略地于甲頻逢寇敵言出奇決戰所向皆捷大挫東

人之銳太祖錄其績以排陣斬斫之號委之尋表爲宿州刺史檢
校右僕射于時徐宿兵鋒日夕相接控扼偵邏以言爲首景福初
時溥大舉來攻宿州言勇于野戰喜逢大敵自引銳兵擊溥殺傷
甚衆徐戎乃退言爲流矢所中一夕而卒

李唐賓陝州陝縣人也中和四年二月尙讓之寇繁臺也唐賓與
李讜霍存竝爲巢將與太祖之軍戰于尉氏門外三月太祖破瓦
子寨唐賓與王虔裕來降時黃巢壁于陳郊乃命唐賓摩其西闌
焚焉王滿之師王夏之陣唐賓悉在戰中後與朱珍趣淄州所向
摧敵及取滑平蔡前後破鄆淮徐之衆功與朱珍略等而驍勇絕
倫善用矛未嘗不率先陷陣其善于治軍行師之道亦與珍齊名
珍之擒石璠也唐賓亦沿淮與郭言犄角下盱眙其後渡河破黎
陽李固等鎮攻澶州下內黃敗魏師未嘗不與珍同暨攻蔡之役

珍自西南破其外垣唐賓亦堙壕坎墉摧其東北隅及伐徐取豐
時溥軍于吳康珍亟遇之未能却唐賓引本軍擊敗之珍遂大勝
每與師必與珍偕用故往無不利然而剛中用壯遂爲珍所害以
謀叛聞太祖聞之痛惜累日及誅朱珍後令其妻孥至軍收葬而
加弔祭焉

王虔裕瑯琊臨沂人也家于楚邱少有膽勇多力善射以弋臘爲
事唐乾符中諸葛爽聚徒于青棣間攻剽郡縣虔裕依其衆及爽
歸順乃以虔裕及其衆隸于宣武軍太祖鎮汴四郊多事始議選
將征討首以虔裕縮騎兵恒爲前鋒及太祖擊巢蔡于陳州虔裕
連拔數寨擒獲萬計巢孽旣遁虔裕躡其迹追至萬勝戍賊衆饑
乏短兵繼接而潰太祖以其勞表授義州刺史蔡人日縱侵掠陳
鄭許毫之郊頻年大戰虔裕掩襲攻拒凡百餘陣勦戮生擒不知

紀極秦宗賢寇汴南鄙太祖令虔裕逆擊于尉氏不利而還太祖
怒命削職拘于別部踰年邢州孟遷請降未幾晉人伐邢孟遷遣
使來乞師太祖先遣虔裕選勇士百餘人徑往赴之伺夜突入邢
州明日循堞樹立旗幟晉人不測乃退數月復來圍邢時太祖大
軍方討奄鄆未及救援邢人因而攜貳遷乃繫虔裕送于太原尋
爲所害

劉康又壽州安豐縣人也以農桑爲業唐乾符中關東羣盜竝起
江淮間偏罹其苦因爲巢黨所掠康又沉默有膂力善用矛槊然
不樂爲暴中和三年從太祖赴鎮委以心腹康又枕戈環甲夷險
無憚其後累典親軍襲巢破蔡斬獲尤多累以戰功遷元從都將
從太祖連年攻討徐奄鄆所向多捷尤善于營壘充諸軍壕寨使
及太祖盡下三鎮議其功奏加檢校右僕射兼領軍衛尋遷密州

刺史政甚簡靜時王師範叛據青州乞師于淮夷淮人遂攻密州密兵素少執銳者不滿千夫而淮賊踰萬康又率老弱守陴自別領少壯日與接戰于密之四郊俘擒千計賊知密州虛弱援兵未至晝夜急攻遂陷康又為所害

王彥章字賢明鄆州壽張縣人也祖秀父慶宗俱不仕以彥章貴秀贈左散騎常侍慶宗贈右武衛將軍彥章少從軍隸太祖帳下以驍勇聞稍遷軍職累典禁兵從太祖征討所至有功常持鐵槍衝堅陷陣開平二年十月自開封府押牙左親從指揮使授左龍驤軍使三年轉左監門衛上將軍依前左龍驤軍使乾化元年改行營左先鋒馬軍使加金紫光祿大夫檢校司空依前左監門衛上將軍二年庶人友珪篡位加檢校司徒三年正月授濮州刺史本州馬步軍都指揮使依前先鋒馬軍使未幾改先鋒步軍都指

揮使四年為澶州刺史進封開國伯五年三月朝廷議割魏州為兩鎮慮魏人不從遣彥章率精騎五百屯鄴城駐于金波亭以備非常是月二十九日夜魏軍作亂首攻彥章于館舍彥章南奔七月晉人攻陷澶州彥章舉家陷沒通鑑云晉人夜襲澶州陷之刺史王彥章在劉鄩營晉人獲其妻子晉王遷其家于晉陽待之甚厚遣細人間行誘之彥章即斬其使以絕之後數年其家被害九月授汝州防禦使檢校太保依前行營先鋒步軍都指揮使貞明二年四月改鄭州防禦使三年十二月授西面行營馬軍都指揮使加檢校太傅依前鄭州防禦使頃之授行營諸軍左廂馬軍都指揮使五年五月遷許州兩使留後軍職如故六年正月正授許州匡國軍節度使充散指揮都頭都軍使進封開國侯未幾授北面行營副招討使七年正月移領滑州三年四月晦晉師陷鄆州中外大恐五月以彥章代戴思遠為北面招

擢居方面與皇帝十五年抗衡今日兵敗力窮死有常分皇帝縱
垂矜宥何面目見人豈有為臣為將朝事梁而暮事晉乎得死幸
矣晉王又謂李嗣源曰爾宜親往諭之庶可全活時彥章以重傷
不能興嗣源至臥內以見之謂嗣源曰汝非邈佶烈乎邈佶烈蓋
嗣源小字也彥章素輕嗣源故以小字呼之既而晉王命肩輿隨
軍至任城彥章以所傷痛楚堅乞遲留遂遇害時年六十一彥章
性忠勇有膂力臨陣對敵奮不顧身嘗謂人曰李亞子鬪雞小兒
何足畏初晉王聞彥章授招討使自魏州急赴河上以備衝突至
則德勝南城已為所拔晉王嘗曰此人可畏當避其鋒一日晉王
領兵迫潘張寨大軍隔河未能赴援彥章援槍登船叱舟人解纜
招討使賀瓌止之不可晉王聞彥章至抽軍而退其驍勇如此及
晉高祖遷都夷門嘉彥章之忠款詔贈太師搜訪子孫錄用五代史補王彥

章之應募也同時有數百人而彥章營求為長眾皆怒曰彥章何人一旦自草野中出便欲居我輩之上是不自量之甚也彥章聞之乃對主將指數百人曰我天與壯氣自度汝等不及故求作長耳汝等咄咄得非勝負將分之際耶且大凡健兒開口便言死死則未暇且其汝輩赤脚入棘針地走三五遭汝等能乎眾初以為戲既而彥章果然眾皆失色無敢效之者太祖聞之以為前人遽擢用之

賀德倫其先河西部落人也父懷慶隸滑州軍為小校德倫少為
滑之牙將太祖領四鎮德倫以本軍從繼立軍功累歷刺史畱後
遷平盧軍節度使及魏博楊師厚卒朝廷以德倫代其任貞明元
年三月二十九日夜魏軍作亂執德倫囚于別館盡殺其部眾為
亂首張彥所迫遣使歸款于太原晉王自黃澤嶺東下至臨清德
倫遣從事司空頴密啓晉王訴以張彥凌辱之事晉王至永濟斬
彥等八人然後入于魏德倫即以符印上晉王通鑑晉王既入德倫上印節請王兼領天雄軍王固
辭曰此間汴寇侵逼貴道故親董師徒遠來相救又聞城中新羅塗炭故暫入存無明公不垂鑒信乃以印節見推誠非素懷德倫再拜曰今寇敵密邇軍城新有大變人心未安德倫心腹紀綱為張彥所殺始盡形孤勢弱安能統軍一日生事恐負大恩王乃受之尋授雲州節度使行次河東監軍張承

業留之不遣頃之王檀以急兵襲太原德倫部下多奔逸承業懼其為變遂誅德倫并其部曲盡殺之

舊五代史卷二十一

舊五代史卷二十一攷證

梁列傳十一龐師古傳始表為天平軍節度留後尋除授徐州節

度使 案師古先為留後繼授節度通鑑止作留後誤

霍存傳用本部騎兵敗秦賢軍 秦賢王虔裕傳作秦宗賢

有賊升眺樓大詬 眺樓原本作昭樓今據歐陽史改

符道昭傳符道昭淮西人 案歐陽史作蔡州人

徐懷玉傳授左羽林統軍 案歐陽史作右羽林統軍

郭言傳破盱眙而還 案通鑑作言力戰得免梁祖紀亦作不克

而還與此傳異

李唐賓傳時溥軍于吳康 吳康原本訛吳唐今據歐陽史改正

王虔裕傳時太祖大軍方討兗鄆未及救援 案通鑑攷異云是

時全忠方攻時溥未討兗鄆也傳誤

舊五代史

卷二十一攷證

通鑑攷異

劉康又傳尋遷密州刺史 密州原本訛宣州今據新唐書昭宗

紀改正

王彥章傳彥章字賢明鄆州壽張縣人也 賢明歐陽史作子明

壽張歐陽史作壽昌

領保鑾騎士數千于東路守捉 案歐陽史從家傳作五百人又
作畫像記極辨舊史領數千人以往之非攷通鑑云梁主命王
彥章將保鑾士及他兵合萬人屯兗鄆之境又通鑑李嗣源敗
彥章于遞坊鎮獲將士三百人斬首二百級使彥章所將止于
五百恐師徒盡喪不應尚能再戰也彥章忠于所事力竭而亡
非戰之罪歐陽史必欲減其兵數轉非實錄

舊五代史卷二十一攷證

舊五代史卷二十一

宋 薛 居 正 等 撰

梁書第二十二

列傳十二

楊師厚潁州斤溝人也為李罕之步將以猛決聞尤善騎射及罕
之敗退保澤州師厚與李鐸何綱等來降太祖署為忠武軍牙將
繼歷軍職累遷檢校右僕射表授曹州刺史唐天復三年從太祖
迎昭宗于岐下李茂貞以勁兵出戰為師厚所敗及王師範以青
州叛太祖遣師厚率兵東討時淮賊王景仁以眾二萬來援師範
師厚逆擊破之追至輔唐縣斬數百級授齊州刺史將之任太祖
急召見于鄆西境遣師厚率步騎屯于臨胸而聲言欲東援密州
留輜重于臨胸師範果出兵來擊師厚設伏于野追擊至聖王山

舊五代史

卷二十一

楊師厚

殺萬餘衆擒都將八十人未幾萊州刺史王師誨以兵救師範又大敗之自是師範不復敢戰師厚移軍寨于城下師範力屈竟降天復四年三月加檢校司徒徐州節度使天祐元年加諸軍行營馬步都指揮使二年八月太祖討趙匡凝于襄陽命師厚統前軍以進趙匡凝嚴兵以備師厚至穀城西童山刊材造浮橋引軍過漢水一戰趙匡凝敗散攜妻子沿漢遁去翼日表師厚為山南東道節度畱後舊唐書天祐三年六月甲申敕襄州近因趙匡凝作帥請別立忠義軍額既非往制固是從權忠義軍額宜停廢依舊為山南東道節度使即令南討荊州畱後趙匡開亦棄軍上峽不浹旬併下兩鎮乃正授襄州節度使先是漢南無羅城師厚始與板築周十餘里郭郭完壯開平元年加檢校太保同平章事明年又加檢校太傅三年三月入朝詔兼潞州行營都招討使無何劉知俊據同州叛師厚與劉郭率軍西討至潼關擒知俊弟知浣以獻知俊聞師厚至即西走

鳳翔師厚進攻至長安時知俊已引岐寇據其城師厚以奇兵傍南山急行自西門而入賊將王建驚愕不知所為遽出降制加師厚檢校太尉頃之晉王與周德威丁會符存審等以大衆攻晉州甚急太祖遣師厚帥兵援之軍至絳州晉軍扼蒙阮之險師厚整衆而前晉人乃徹圍而遁四年二月移授陝州節度使五年正月王景仁敗于柏鄉晉人乘勝圍邢州掠魏博南至黎陽師厚受詔以兵屯魏州晉軍攻魏州不克而退師厚追襲過漳河解邢州之圍改授滑州節度使明年太祖北征令師厚以大軍攻棗強逾旬不能克太祖屢加督責師厚晝夜奮擊乃破之盡屠其城車駕還師厚屯魏州及庶人友珪篡位魏州衙內都指揮使潘晏與大將臧延範趙訓謀變有密告者師厚布兵擒捕斬之歐陽史云師厚乘間殺魏牙將潘晏臧延範等越二日又有指揮使趙賓夜率部軍環甲俟旦為亂師厚

逐出節度使羅周翰

卷之二十一列傳

十一

十一

以衙兵圍捕賓不能起乃越城而遁師厚遣騎追至肥鄉擒其黨百餘人歸斬于府門友珪即以師厚爲魏博節度使檢校侍中未幾鎮人晉人侵魏之北鄙師厚率軍至唐店破之斬首五千級擒都將三十餘人是時師厚握河朔兵威望震主友珪患之詔師厚赴闕師厚乃率精甲萬人至洛陽嚴兵于都外自以十餘人入謁友珪懼厚禮而遣之及末帝將圖友珪遣使謀于師厚深陳款效且馳書于侍衛軍使袁象先及主軍大將又遣都指揮使朱漢賓率兵至滑州以應禁旅友珪既誅末帝卽位于東京首封師厚爲鄴王加檢校太師中書令每下詔不名以官呼之事無巨細必先謀于師厚師厚頗亦驕誕先是鎮人以我柏鄉不利之後屢擾邊境師厚總大軍直抵鎮州城下焚盪閭舍移軍掠藁城束鹿至深州而歸乾化五年三月卒于鎮廢朝三日贈太師師厚純謹敏幹

深爲太祖知遇委以重兵劇鎮他莫能及然而末年矜功恃眾驟萌不軌之意于是專割財賦置銀槍效節軍凡數千人皆選摘驍

銳縱恣豢養復故時牙軍之態時人病之清異錄二槍材難得十全魏州石屋材多可用楊師厚時銀槍效節

都皆采于此承前河朔之俗上元比屋夜遊及師厚作鎮乃課魏人戶立

燈竿千缸萬炬洞照一城縱士女嬉遊復彩畫舟舫令女妓權歌

于御河縱酒彌日又于黎陽採巨石將紀德政以鐵車負載驅牛

數百以拽之所至之處邱墓廬舍悉皆毀壞百姓望之皆曰碑來


及碑石纔至而師厚卒魏人以爲悲來之應末帝聞其卒也于私

庭受賀乃議裂魏州爲兩鎮旣而所樹親軍果爲叛亂以招外寇

致使河朔淪陷宗社覆滅由師厚兆之也

牛存節字贊貞青州博昌人也本名禮太祖改而字之少以雄勇

自負唐乾符末鄉人諸葛爽爲河陽節度使存節往從之爽卒存



節謂同輩曰天下洶洶當擇英主事之以圖富貴遂歸于太祖初授宣義軍小將屬蔡寇至金隄驛犯酸棗靈昌存節日與之鬪凡二十餘往每往必執俘而還前後斬首二十餘級獲孳畜甚衆太祖擊蔡賊于板橋赤垌酸棗門封禪寺枯河北存節皆預其行與諸將于濮州南劉橋范縣大破鄆衆自此深爲太祖獎遇文德元年夏李罕之以并軍圍張宗奭于河陽太祖遣存節率軍赴之屬歲歉饑餽不至村民有儲乾樵者存節以器用錢帛易之以給軍食大破賊于泚河罕之引衆北走又預討徐宿有功及討河北存節前鋒下黎陽收臨河至內黃西以兵千餘人當魏人萬二千衆大破其陣殪仆蔽野太祖深所歎激謂有神兵之助大順元年改滑州左右廂牢城使與諸將討時溥累破賊軍景福元年秋改遇後都指揮使攻濮之役領軍先登遂拔其壘二年四月下徐州梟

時溥存節力戰其功居多乾寧二年授檢校工部尚書三年夏太祖東討鄆州存節領軍次故樂亭扼其要路都指揮使龐師古屯馬頰存節密與都將王言謀入鄆壘十二月存節遣王言夜伏勇士于州西北以船踰濠舉梯登陴旣而王言不克入存節獨率伏軍負梯輜破其西甕城奪其濠橋諸軍俱進四年四月陷其城尋與葛從周降下兗州加檢校右僕射其年秋大舉以伐淮南至濠州東聞前軍失利于清口諸軍退至淠河無復隊伍存節遏其後諸將釋騎步鬪諸軍稍得濟收合所部並敗兵共八千餘人至于淮涘時不食已四日矣存節訓勵部分以禦追寇遂得旋師五年除亳州刺史俄遷宣武軍都指揮使改宿州刺史明年淮賊大至彭城存節乃以部下兵夜發直趣彭門淮人訝其神速震恐而退諸將服其智識光化二年罷歸復爲左衙都將兼馬步教練使天

復元年授潞州馬步都指揮使法令嚴整士庶安之及追赴行在士卒泣送者不絕于道加金紫光祿大夫檢校司空改滑州左衙步軍指揮使知邢州軍州事天祐元年授邢州團練使時州兵纔及二百人晉人知之以大軍來寇太祖在鄴發長直兵二千人赴援存節率壯健出鬪以家財賞激戰士并軍急攻七日不能克而去太祖召至勞慰久之厚資金帛鞍馬加檢校司徒冬罷軍署爲元帥府左都押衙四年太祖受禪除右千牛衛上將軍其秋攻潞州以存節爲行營馬步軍都排陣使開平二年二月自右監門衛上將軍轉右龍虎統軍駐留洛下是歲王師敗于上黨晉人乘勝進迫澤州州城將陷河南畱守張全義召存節謀遂以本軍及右龍武羽林等軍往應接上黨師至天井關存節謂諸將曰是行也雖不奉詔旨然要害之地不可致失時晉人新

鋒甚盛存節

引衆而前銜枚夜至澤州適遇守陴者已縱火鼓噪以應外軍刺史保衙城不知所爲存節纔入晉軍已至矣乃分布守禦晉軍四面攻鬪開地道以入城存節亦以隧道應之逆戰于地中晉軍不能進又以勁弩射之中者人馬皆洞經十三日晉軍死傷者甚衆焚營而退郡以獲全太祖屢歎賞之五月遷左龍虎統軍充六軍馬步都指揮使十月授絳州刺史三年四月除鄜州畱後六月劉知俊以同州叛尋授同州畱後未幾加檢校太保同州節度使乾化二年加檢校太傅進封開國公存節戒嚴軍旅常若敵至先是州中井水鹹苦人不可飲及并人岐人來迫州城或以爲兵士渴乏陷在旦夕存節乃肅拜虔祝擇地鑿八十餘井其味皆甘淡由是人馬汲濯有餘衆以爲至誠之感自八月至三年春末人馬未嘗釋甲以至寇退尋加同平章事詔赴闕末帝召慰勉賞賜甚厚


十一月加開府儀同三司食邑一千戶授鄆州節度使四年加淮南西北面行營招討使控扼淮濱邊境安之其冬蔣殷據徐州逆命存節方以大衆戍潁州得殷逆謀密以上聞遽奉詔與劉鄩同討之頓于埇上淮賊朱瑾以兵救殷距宿之兩舍聞存節兵大至卽委糧棄甲而遁竟平徐州詔加太尉夏中病渴且瘠屬河北用軍末帝令率軍屯陽畱以張劉鄩之勢存節忠憤彌篤未嘗言病料敵治戎旦夕愈厲病革詔歸汶陽翼日而卒將終戒其子知業知讓等以忠孝言不及他冊贈太師存節武鷲慷慨有大節野戰壁守皆其所長威名聞于境外深爲末帝所重而木強忠厚有賈復之風焉

王檀字衆美京兆人也曾祖泚唐左金吾衛將軍隴州防禦使祖曜定難功臣渭橋鎮遏使父環鴻臚卿以檀貴累贈左僕射檀少

英悟美形儀好讀兵書洞曉韜略唐中和中太祖鎮大梁檀爲小將四年汴將楊彥洪破巢將尚讓李讜于尉氏門外檀在戰中摧鋒陷陣遂爲太祖所知稍蒙擢用預破蔡賊于斤溝肥河八角遷踏白都副將光啓二年從胡眞擊淮西之衆解河陽之圍蔡賊張存敢乘亂據洛陽檀與勇士數十人潛入賊柵邀其輜重存敢遁走胡眞至陝州開通貢路遣檀攻玉山寨降賊帥石合殷從擊秦宗賢于鄭州西北河灘之上于太祖馬前射賊將孫安應弦而斃三年佐都指揮使朱珍敗徐戎于孫師陂獲其將孫用和束詡以獻從擊蔡賊于板橋偏將李重裔追賊馬躡爲蔡人所擒檀奪取而旋獲賊將薛注太祖破朱瑾于劉橋檀盡收其軍實文德元年三月討羅宏信敗魏人于內黃檀獲其將周儒劬神劍以歸補衝山都虞候是歲與諸軍平蔡州明年佐朱珍大破時溥之衆檀獲

賊將何肱改左踏白馬軍副將預征克鄆累立戰功大順元年從
龐師古渡淮深入討孫儒之亂奪邵伯堰破高郵軍檀奮命擊賊
刃傷左臂未幾遷順義都將天復中從太祖率四鎮之師圍鳳翔
以迎昭宗屢立戎效遷左踏白指揮使從攻王師範于青州檀以
偏師收復密郡永陽志云張訓守密州刺史宋全忠至青州訓謂諸將曰汴人將至何以
居前口以精兵殿其後而去全忠遂權知軍州事克本州馬步軍都指揮使
尋授檢校右僕射守密州刺史郡接淮戎舊無壁壘乃率夫修築
羅城六旬而畢居民賴之加檢校司空開平二年六月授邢州保
義軍節度使檢校司徒三年加檢校太保充潞州東北面行營招
討使乾化元年正月王景仁與晉人戰于柏鄉王師敗績河朔大
震景仁與眾為敵騎所追檀嚴設備應接敗軍助以資裝獲濟者
甚眾俄而晉軍大至重圍四合土山地穴晝夜攻擊太祖憂之檀

密上表請駕不親征而悉力枝梧竟全城壘三月以功就加檢校
太傅同平章事七月又加開府儀同三司檢校太尉進封瑯琊郡
王命宣徽使趙殷衡資詔慰諭賜絹千疋銀千兩賞守禦邳州之
功也庶人友珪僭位授鄧州宣化軍節度使檢校太尉兼侍中末
帝即位移授許州匡國軍節度使加檢校太師五年蔡州刺史王
彥溫作亂檀受詔討平之加兼中書令貞明元年三月魏博軍亂
六月晉王入魏州分兵收下屬郡河北大擾檀受詔與開封尹劉
鄩犄角進師以援河北檀攻澶州魏縣下之擒賊將李巖王開關
以獻頃之檀密疏請以奇兵西趣河中自陰地關襲取晉陽末帝
許之即馳兵而去二年二月師至晉陽晝夜急攻其壘并州幾陷
既而蕃將石家才自潞州以援兵至檀引軍大掠而還尋授天平
軍副大使知節度使事充鄆齊曹等州觀察等使先是檀招誘羣



盜選其勁悍者寘于帳下以爲爪牙至是數輩竊發突入府第檀
素不爲備遂爲所害時年五十一節度副使裴彥聞變率府兵盡
擒諸賊州城帖然尋冊贈太師諡曰忠毅葬于開封縣之阜門原
有子六人皆升朝列

史臣曰夫大都偶國春秋所非當師厚之據鄴城也縮數萬之甲
兵擅六州之輿賦名旣震主勢亦滔天逮其喪亡須議分割由茲
以失河朔因是以啓晉人詩所謂誰生厲階者師厚之謂歟存節
王檀俱出身事主底力圖功觀其方略皆將帥之良者也

五代史卷二十二

舊五代史卷二十二攷證

梁列傳十二楊師厚傳晉軍扼蒙阮之險 阮原本作阮攷通鑑
注云蒙阮在汾水之東東西三百餘里蹊徑不通卽此處也今
改正

晉人乃徹圍而遁 案通鑑攷異引梁實錄云生擒賊將蕭萬通
等賊由是棄寨而遁莊宗實錄云汴軍至蒙阮周德威逆戰敗
之二軍各言勝捷其互異如此通鑑從是書

牛存節傳牛存節字贊貞 贊貞原本作替貞夏文莊集引薛史
又作潛真今據歐陽史改正

大破賊于泚河 泚河原本訛泚河今據歐陽史及通鑑改正
存節訓勵部分以禦追寇遂得旋師 案舊唐書作牛存節一軍
以先渡獲免與是書所云追寇旋師異

末帝合率軍屯陽雷 案陽雷卽楊劉見通鑑攷異又攷李重進

碑作楊雷新唐書作楊劉蓋地名通用

王檀傳補衝山都虞候 衝山原本訛衡山今據歐陽史改正

舊五代史卷二十三

宋 薛 居 正 等 撰

梁書第二十三

列傳十三

劉鄩密州安邱縣人也祖綬密州戶掾累贈左散騎常侍父融安邱令累贈工部尚書鄩幼有大志好兵略涉獵史傳唐中和中事青州節度使王敬武爲小校敬武卒三軍推其子師範爲雷後朝廷命崔安潛鎮青州州人拒命棗州刺史張蟾將襲師範師範遣都指揮使盧宏攻棗州宏反與蟾通僞旋軍以襲師範師範知之設伏兵以迎宏旣而享之先誡鄩曰宏至卽斬之鄩如約斬宏于座上同亂者皆誅之師範以鄩爲馬步軍副都指揮使攻下棗州殺張蟾朝廷因授師範平盧軍節度使光化初師範表鄩爲登州

刺史歲餘移刺淄州署行軍司馬天復元年昭宗幸鳳翔太祖率
 四鎮之師奉迎于岐下李茂貞與內官韓全誨矯詔徵天下兵入
 援師範覽詔慷慨泣下遣腹心乘虛襲取太祖管內州郡所在同
 日竊發其事多泄唯鄆以偏師陷兗州遂據其郡初鄆遣細人詐
 為鬻油者覘兗城內虛實及出入之所視羅城下一水竇可以引
 衆而入遂誌之鄆乃告師範請步兵五百宵自水竇銜枚而入一
 夕而定軍城晏然市民無擾金華子云鄆入據子城甲兵精銳城內人皆束手莫敢
 旅拒加以州將悍虐人情不附鄆因而撫治民皆安堵
 太祖命大將葛從周攻之時從周為節度使領兵在外州城為鄆
 所據家屬悉在城中鄆善撫其家移就外第供給有禮升堂拜從
 周之母及從周攻城鄆以板輿請母登城母告從周曰劉將軍待
 我甚至不異于兒新婦已下並不失所劉將軍與爾各為其主爾
 其察之從周歔歔而退鄆料簡城中老疾及婦人浮食百姓不足


與守者悉出之于外與將士同甘苦分衣食以抗外軍戢兵禁暴
 居人泰然從周攻圍既久鄆無外援人情稍有去就之意一日節
 度副使王彥溫踰城而奔守陴者從之而逸鄆之守兵禁之不可
 鄆即遣人從容告彥溫曰請副使少將人出非素遣者請勿帶行
 又揚言于衆曰素遣從副使行者即勿禁其擅去者族之守民間
 之皆感奔逸者乃止外軍聞之果疑彥溫有姦即戮之于城下自
 是軍城遂固及王師範兵力漸窘從周以禍福諭鄆俾之革面鄆
 報曰俟青州本使歸降即以城池還納天復三年十一月師範告
 降且言先差行軍司馬劉鄆領兵入兗州請釋其罪亦以告鄆鄆
 即出城聽命太祖嘉其節槩以為有李英公之風鄆既降從周具
 行裝服馬請鄆歸大梁鄆曰未受梁王捨釋之旨乘肥衣裘非敢
 聞命即素服跨驢而發及將謁見太祖令賜冠帶鄆曰纍囚負罪

請就紮而入太祖不許及見慰撫移時且飲之酒鄴以量小告太祖太祖曰取兗州量何大耶旋授元從都押牙太祖牙下諸將皆四鎮舊人鄴一旦以羈旅之臣驟居衆人之右及與諸將相見並用階庭之禮太祖尤奇重之未幾表爲鄜州留後是時邠岐之衆屢寇其境鄴禦捍備至太祖以其地遠慮失鄴卽令棄郡引軍屯于同州天祐二年二月授右金吾衛大將軍充街使三年正月太祖授元帥之任以鄴爲元帥府都押牙執金吾如故開平元年授右金吾上將軍充諸軍馬步都指揮使其年秋與諸將征潞州遷檢校司徒三年二月轉右威衛上將軍依前諸軍馬步都虞候五月改左龍武統軍充侍衛親軍馬步軍都指揮使其年夏同州劉知俊反引岐人襲據長安分兵扼河潼太祖幸陝命鄴西討卽奮取潼關擒知俊弟知浣以獻遂引兵收復長安知俊棄郡奔鳳翔

太祖以鄴爲佑國同州軍兩使留後尋改佑國軍爲永平軍以鄴爲節度使檢校司徒行大安尹金州管內觀察使是時西鄙未寧密邇寇境鄴練兵撫衆獨當一面四年加檢校太保同平章事庶人友珪篡位加檢校太傅乾化三年正月丁內艱友珪命起復視事末帝卽位尤深倚重明年夏詔鄴歸闕授開封尹遙領鎮南軍節度使旋屬晉人寇河朔鄴奉詔與魏博節度使楊師厚禦之而退九月徐州節度使蔣殷據城叛時朝廷以福王友璋鎮徐方殷不受代末帝遣鄴與鄆帥牛存節率兵攻之殷求援于淮夷僞吳楊溥遣大將朱瑾領衆赴援鄴逆擊破之貞明元年春城陷殷舉族自燔于火中得其尸梟首以獻詔加檢校太尉三月魏揚師厚卒朝廷分相魏爲兩鎮遣鄴率大軍屯南樂以討王鎔爲名旣而魏軍果亂囚節度使賀德倫送款于太原六月晉王入魏州鄴以

精兵萬人自洹水移軍魏縣晉王來覘鄆設伏于河曲叢本間俟
 晉王至大譟而進圍之數匝殺獲甚衆晉王僅以身免是月鄆潛
 師由黃澤西趨太原將行慮爲晉軍所追乃結芻爲人縛旗于上
 以驢負之循堞而行數日晉人方覺軍至樂平會霖雨積旬師不
 克進鄆卽整衆而旋魏之臨清積粟之所鄆引軍將據之遇晉將
 周陽五自幽州率兵至鄆乃取貝州與晉軍遇于堂邑鄆邀擊卻
 之追北五十餘里遂軍于莘縣增城壘浚池隍自莘及河築甬道
 以通餉路八月末帝賜鄆詔曰闔外之事全付將軍河朔諸州一
 旦淪沒勞師弊旅患難日滋退保河壩久無鬪志昨東面諸侯奏
 章來上皆言倉儲已竭飛輓不充于役之人每遭擒擄夙宵軫念
 惕懼盈懷將軍與國同休當思良畫如聞寇敵兵數不多宜設機
 權以時翦撲則子之負荷無累先人鄆奏曰臣受國深恩忝茲闔

政敵不枕戈假寐罄節輸忠昨者比欲西取太原斷其歸路然後
 東收鎮冀解彼連雞止于旬時再清河朔豈期天方稔亂國難未
 平纔出師徒積旬霖潦資糧殫竭軍士札瘥切慮蒼黃乖于統攝
 乃詢部伍皆欲旋歸凡次舍經行每張犄角又欲絕其餉道且據
 臨清纔及宗城周陽五奄至騎軍馳突變化如神臣遂領大軍保
 于莘縣深溝高壘享士訓兵日夜戒嚴伺其進取偵視營壘兵數
 極多樓煩之人皆能騎射最爲勍敵未可輕謀臣若苟得機宜焉
 敢坐滋患難臣心體國天鑒具明末帝又遣使問鄆決勝之策鄆
 曰臣無奇術但人給糧十斛盡則破敵末帝大怒讓鄆曰將軍蓄
 米將療飢耶將破賊耶乃遣中使督戰鄆集諸校而謀曰主上深
 居宮禁未曉兵機與白面兒共謀終敗人事大將出征君命有所
 不受臨機制變安可豫謀今揣敵人未可輕動諸君更籌之時諸



將皆欲戰鄆默然他日復召諸將列坐軍門人具河水一器因命飲之衆未測其旨或飲或辭鄆曰一器而難若是滔滔河流可勝既乎衆皆失色居數日鄆率萬餘人薄鎮定之營時鄆軍奄至上下騰亂殺獲甚衆少頃晉軍繼至乃退二年三月鄆自莘引軍襲魏州與晉王戰于故元城王師敗績鄆脫身南奔自黎陽濟河至滑州尋授滑州節度使詔屯黎陽三年二月晉王悉衆來攻黎陽鄆拒之而退及鄆歸闕再授開封尹領鎮南軍節度使其年河朔失守朝廷歸咎于鄆鄆亦不自安上表避位九月落平章事授亳州團練使屬淮人寇蔡潁毫三郡鄆奉命渡淮至霍邱大殲賊黨五年兗州節度使張萬進反北結晉人爲援末帝遣鄆攻之鄆爲兗州安撫制置使是冬萬進危蹙小將邢師遇潛應王師遂拔其城梟萬進首以獻十一月制授秦寧軍節度使檢校太尉同平章

事 年六月授河東道招討使與華州尹皓攻取同州先是河中朱友謙襲取同州以其子令德爲留後表請旄鉞末帝怒命鄆討之其年九月晉將李嗣昭率師來援戰于城下王師不利敗兵走河南橋梁陷溺死者甚衆鄆以餘衆退保華州羅文寨先是鄆與河中朱友謙爲婚家及王師西討行次陝州鄆遣使資檄與友謙諭以禍福大計誘令歸國友謙不從如是停畱月餘尹皓段凝輩素忌鄆遂構其罪言鄆逗留養寇俟援兵末帝以爲然及兵敗詔歸洛河南尹張宗奭承朝廷密旨逼令飲醜而卒時年六十四詔贈中書令子遂凝遂雍別有傳

賀瓌字光遠濮陽人也會祖延以瓌貴贈左監門上將軍祖華贈左散騎常侍父仲元贈刑部尚書瓌少儻負雄勇之志遇世亂入軍朱瑄爲濮州刺史兼鄆州馬步軍都指揮使拔爲小將唐光

啓初鄆州三軍推瑄爲留後以瓌爲馬步軍都指揮使表授檢校工部尚書及瑄與太祖構隙瓌受瑄命數領軍于境上乾寧二年十月太祖親征克鄆十一月瑄遣瓌與太原將何懷寶率兵萬餘人以援朱瑾師次待賓館斷我糧運太祖偵知之自中都引軍夜馳百餘里遲明至鉅野東與瓌等接戰克人大敗瓌竄于棘塚之上大呼曰我是鄆州都將賀瓌願就擒幸勿傷也太祖聞之馳騎至塚前遂擒之并獲何懷寶及將吏數十人徇于克壁之下悉命戮之唯留瓌一人釋縛寘之麾下尋署爲教練使奏授檢校左僕射瓌感太祖全宥之恩私誓以身報國天復中預平青州王師範以功授曹州刺史兼先鋒都指揮使加檢校司空天復二年與楊師厚從太祖平荆襄授荆南兩使留後未幾徵還爲行營左廂步軍都指揮使開平二年十月授左龍虎軍馬步都指揮使十二月

改左衛上將軍充六軍馬步都虞候三年五月轉右龍虎統軍未幾加檢校司徒邢州團練使四年二月改澤州刺史充昭義軍節度留後檢校太保進封開國侯乾化二年七月授相州刺史尋加檢校太傅有頃轉左龍虎統軍貞明二年慶州叛爲李繼陟所據瓌以本官充西面行營馬步軍都指揮使兼諸軍都虞候與張筠破涇鳳之衆三萬下寧衍二州三年秋慶州平十二月瓌以功授滑州宣義軍節度使依前檢校太傅加同平章事尋授北面行營招討使四年春晉人取楊劉城據之八月瓌與許州節度使謝彥章領大軍營于濮州之行臺村對壘數月一日晉王以輕騎挑戰瓌與彥章發伏兵奮擊晉王僅以身免先是瓌與彥章不協是歲冬十二月復爲諸軍都虞候朱珪所構瓌乃伏甲士殺彥章及濮州刺史孟審澄別將侯溫裕等于軍以謀叛聞是月瓌與晉人大

戰于胡柳陂晉人敗績臨陣斬晉將周陽五旣晡環軍亦敗五年春正月晉人城德勝夾河爲柵四月瓌率大軍攻其南柵以艤艦戰艦扼其中流晉人斷我艤艦濟軍以援南柵瓌退軍于行臺尋以疾卒時年六十二詔贈侍中長子光圖仕後唐爲供奉官康懷英兗州人也本名懷貞避末帝御名故改之始以驍勇事朱瑾爲列校唐乾寧四年春太祖旣平鄆命葛從周乘勝急攻兗州時朱瑾在豐沛間搜索糧餉畱懷英守其城及從周軍至懷英聞鄆失守乃出降太祖素聞其名得之甚喜尋署爲軍校光化元年秋從氏叔琮伐襄漢懷英以一軍攻下鄧州三年從征河朔佐張存敬敗燕軍于易水之上天復元年冬太祖率師迎昭宗于鳳翔時李茂貞遣大將符道昭領兵萬餘屯武功以拒太祖命諸軍擊之以懷英爲前鋒領衆先登一鼓而大破之擄甲士六千餘人奪

馬二千匹翼日太祖方至顧左右曰邑名武功今首盪逆黨真武功也乃召懷英大加獎激仍以駿馬珍器賜之二年四月符道昭復領大軍屯于虢縣之漢谷其建寨之所前臨巨澗後倚峻阜險不可升太祖遣懷英提騎數千急擊之道昭以懷英兵寡有俯視之意乃率甲士萬人絕澗以挑戰懷英始以千騎夜鬪戰酣發伏兵以擊之岐軍大敗秋八月鄜帥李周彝屯軍于三原以援鳳翔太祖命懷英討之周彝拔軍而遁追至梨園因攻下翟州擒其守來獻俄而岐軍屯奉天太祖令懷英寨于岐軍之東北以備敵人一夕岐軍大至急攻其營懷英以夜中不可驚動諸軍獨以二千餘人抗數萬之衆自乙夜至四鼓身被十餘創岐軍不勝而退昭宗遣京賜迎饗毅勇功臣是歲淮人聞青兗之叛遣兵數萬以寇宿州太祖命懷英馳騎以救之淮人遁去卽以懷英爲權知宿州

刺史天祐三年冬佐劉知俊破邠鳳之衆五萬于美原收五千餘
寨乘勝引軍攻下鄜州以功授陝州節度使太祖受禪加檢校太
保開平元年夏命將大軍以伐潞州將行太祖謂懷英曰卿位居
上將勇冠三軍向來破敵摧鋒動無遺悔至于高爵重祿我亦無
負于卿夫忠臣事君有死無二韓信所謂漢王載我以車衣我以
衣食我以食食人之祿死人之憂我每思韓信此言真忠烈丈夫
耳如丁會受我待遇之恩不謂不至懷黃拖紫裂土分茅設令木
石偶人須感恩義一朝反噬倒戈授人苟有天道明神安能容此
大凡孤恩負理忠良不爲我今掃境內委卿卿當勉思竭盡況晉
人新得上黨衆心未叶和以十萬之師一舉可克子當置酒高會
望卿歌舞凱旋懷英惶恐而退六月懷英領大軍至潞率衆晝夜
攻城半月之間機巧百變懷英懼太祖之言期于必取乃築壘環

城濬鑿池塹然而屢爲晉將周德威騎軍所撓懷英不敢卽戰太
祖乃以李思安代之降爲行營都虞候夏五月晉王率蕃漢大軍
攻下夾城懷英逃歸詣銀臺門待罪太祖宥之改授右衛上將軍
三年夏命爲侍衛諸軍都指揮使尋出爲陝州節度使兼西路行
營副招討使及劉知俊奔鳳翔引岐軍以圖靈武太祖遣懷英率
兵救之師次長城嶺爲知俊邀擊懷英敗歸歐陽史云還至昇平知俊掩擊
三水知俊遣兵據險邀之左龍驤軍使壽張王彥章力戰懷貞等乃得過懷貞與裨將李德遇許
從實王審權分道而行皆與懷兵不相值至昇平劉知俊伏兵山口懷貞大敗僅以身免德遇等
軍皆沒蓋懷英過長城嶺之險四年春移華州節度使乾化二年秋命爲河
中行營都招討使與晉軍戰于白徑嶺敗歸于陝末帝嗣位以岐
軍屢犯秦雍命懷英爲永平軍節度使大安尹累加官至中書令

貞明中卒于鎮

王景仁


景仁本名茂章避梁
諱改焉詳見通鑑注

廬州合淝人材質魁偉性暴率無威儀善

用梁頗推驍悍在淮南累職為都指揮使楊行密偽署宣州節度使行密死子渥自立忌其勇悍且有私憾欲害之景仁棄宛陵以腹心百人歸吳越王錢鏐新唐書楊行密傳渥求茂章親兵不得宜釐惟亦以鏐行茂章慢罵不與踰年遣兵五千襲之茂章奔杭州鏐倅為兩府行軍司馬具以狀聞太祖復命遙領宣州節度使檢校太傅同平章事鏐以淮寇終為巨患欲速平之命景仁奉表至關面陳水陸之計請合禁旅太祖異禮待之頒賜殊厚顧曰待我平代北寇當盡以王師付汝南討于是留京師每預丞相行列劉知俊之叛也從駕至陝始佐楊師厚西入關兵未交知俊棄馮翊走進尅雍華降王建張君練頗預戰有功太祖嘉之時鎮定作逆朋附沙陀遂擢為上將付步騎十萬為北面行營都招討使開平二年正月二日與晉軍戰于柏鄉王師敗績太祖怒甚拘之私第然以兩浙元勳所薦且欲收其後效止落平章事罷兵柄而已歐陽史景仁及

晉人戰大敗于柏鄉景仁歸訴于太祖太祖曰吾亦知之蓋韓勅李思安輕汝為客而不從節度爾數月復其官爵末帝即位復用為南面北面行營招討應接使以兵萬餘人伐壽州至霍邱接戰擒賊將袁藁王彥威王璠等送京師俄而朱瑾以大軍至景仁力戰不屈常以數騎身先奮擊寇不敢逼乃引兵還及濟淮復為殿軍故不甚劬瑾亦不敢北渡九國志朱景傳王茂章來寇度淮水可涉處立表識之景易置子深潭水中立表浮木之上茂章軍敗望表而涉溺死者大半積其尸為京觀及歸病疽而卒詔贈太尉

史臣曰劉鄩以機略自負賀瓌以忠毅見稱懷英以驍勇佐時景仁以貞純許國較其器業皆名將也然雖有善戰之勞亦有敗軍之咎則知兵無常勝豈虛言哉然鄩之據兗州也盡誠于師範比跡于英公方之數侯加一等矣



淵于英公式之類對以一善矣

之將領朕與無常細豈溫言姑然摩之難交此也蓋端于相難其
二以貞撫治則其器業皆存謀也然繼百善輝之榮亦百期軍
史曰曰既稱以難自負賢與以忠謀良爾對英以難與也御景
亦其山八第
世顯衣浩六半
軍姑不其也重亦不難其難
此則志非景
輝不風滑以難德良武奮舉家不難國以臣兵數又齊其難
鮮類深遠英王意類王辭善送京而難而未難以大軍至景二
為南面北面營計情懇對也以其萬翰人外壽州至雲州對難

亦味之善難也安難或為容而不發難與難
人難大烈下時顯景二顯指十大厥太師曰吾 嫂曰其官籍末帝唱對對曰

舊五代史卷二十三攷證

梁列傳十三劉鄩傳朝廷命崔安潛鎮青州 安潛原本訛守潛

今據新唐書改正

太祖命大將葛從周攻之 大將葛從周金華子作克帥張姓疑

傳聞之誤

鄩即出城聽命 案劉鄩叛附于梁新唐書昭宗紀作十月丁丑

與是書作十一月異

以為有李英公之風 英公原本訛殷公攷新唐書李勣封英國

公今改正

殺獲甚眾晉王僅以身免 案通鑑作晉王帥騎馳突所向披靡

自午至申乃得出亡其七騎與此云僅以身免異蓋當時梁唐

二史各有誇張掩飾故所紀不同如此

通令飲醜而卒 案通鑑攷異引莊宗實錄作憂恚發病卒

賀瓌傳張筠破涇鳳之衆三萬 張筠原本訛張節今據通鑑攷

異改正

別將侯溫裕等 侯溫裕玉堂閒話作侯溫疑傳聞之異

五代史卷二十四

宋 薛居正等 撰

梁書第二十四

列傳十四

李琕字公度隴西燉煌人五世祖忠懿公愷有大節見唐史父毅
仕懿僖朝官至右諫議大夫琕聰悟有才學尤工詞賦僖宗朝晉
公王鐸提兵柄鎮滑臺毅居賓席鐸見琕大賞歎之年二十四登
進士第解褐授校書郎拜監察御史俄丁內艱先是父旅殯在遠
家貧無以襄事與弟珙當臘雪以單縗扶杖銜哀告人由是兩克
遷柩而琕日不過食一溢恒羸臥喪廬中不能興大為時賢所歎
憂闋再徵為御史以瘠不起成汭之鎮荊州辟為掌書記踰時乃
就天復中淮寇大舉圍夏口逼巴陵太祖患之飛命成汭率水軍

十萬援于鄂珽入言曰今舳艫容介士千人載稍倍之緩急不可動吳人剽輕若爲所絆則武陵武安皆我之讎也將有後慮不如遣驍將屯巴陵大軍對岸一日不與戰則吳寇糧絕而鄂州圍解矣內性剛決不聽淮人果乘風縱火舟盡焚兵盡溺內亦自沈于江朗人潭人遂入荆渚一如所料未幾襄帥趙匡凝復奏爲掌記入爲左補闕又明年太祖爲元帥以襄師貳于已率兵擊破之趙匡凝奔揚州太祖復署珽爲天平軍掌書記一日大會將佐指珽曰此眞書記也滄州節度使劉守文拒命太祖引兵十餘萬圍之久而未下乃召珽草檄珽卽就外次筆不停綴登時而成大爲太祖嗟賞受禪之歲宰臣除爲考功員外郎知制誥珽揣太祖未欲首以舊僚超拜清顯三上章固辭優詔褒允尋以本官監曹州事曹去京數舍吏民豪猾前後十餘政未有善罷者珽在任期歲衆

庶以寧入爲兵部郎中崇政院學士未幾以許帥馮行襲疾甚出爲許州畱後先是行襲有牙兵二千皆蔡人也太祖深爲憂乃遣珽馳往以伺察之珽至傳舍召將吏親加撫慰行襲欲使人代受詔珽曰東首加朝服禮也乃于臥內宣詔令善自補養苟有不諱子孫俱保後福行襲泣謝遂解二印以授珽代掌軍府事太祖覽奏曰予固知珽必辦吾事行襲門戶不朽矣乃以珽爲匡國軍畱後尋徵爲左諫議大夫兼宣徽副使從征至魏縣過內黃因侍立于行廢太祖顧曰此何故名內黃珽曰河南有外黃小黃故此有內黃又曰外黃小黃在何處對曰秦有外黃都尉理外黃有故墟今在雍邱小黃爲高齊所廢其故墟今在陳畱太祖稱獎數四及庶人友珽篡位除右散騎常侍充傳講學士內討之日軍士大擾珽爲亂兵所傷其夕卒于洛陽珽性孝友與弟琪有敦睦之愛爲

摛紳所稱

案歐陽史有裴迪章震傳今原文已佚無可采補

盧曾字孝伯其先范陽人也頗好書有所執守始為齊州防禦使朱瓊從事瓊降預其謀與之皆來瓊沒太祖辟為宣義幕職曾性忠狷好戇直又不能取容于眾每勳府讌語稍洽曾率然糾正輒又忤旨左長直軍使劉捍委任方重曾亦不能平冀王友謙初定陝府命曾往議事有使院小將從行嗜酒荒逸過度曾復命欲發其罪致疏于袖中累日未果言小將恐事洩先誣告曾使酒幾敗軍事劉捍因證之由是罷職歸于齊之別墅俄而王師範起兵叛太祖促召曾謂之曰子能緩頰說青州使無背盟吾不負子矣曾持檄以往既至青師範囚之送于淮南遇害後太祖暴師範之罪曰喪我骨肉殺我賓僚遂族誅之因召曾二子皆授以官孫隲滑臺人嗜學知書微有辭筆唐光啓中魏博從事公乘億以

女妻之因教以牋奏程式時中原多難文章之士縮影竄跡不自顯億既死魏帥以章表牋疏淹積兼月不能發一字或以隲為言即署本職主奏記事累遷職自支使掌記至節度判官奏官自校書御史郎官中丞檢校常侍至兵部尚書太祖御天下念潛龍時隲奉其主好問往來數十返甚錄之開平三年除右諫議大夫滿歲遷左散騎常侍隲雅好聚書有六經漢史洎百家之言凡數千卷皆簡翰精至披勘詳定得暇即朝夕耽翫曾無少怠乾化二年春太祖將議北巡選朝士三千餘人扈從二月甲子車駕發自洛陽禹中次白馬頓召文武官就食以從臣未集駐蹕以俟之又命飛騎促于道而隲與諫議大夫張衍兵部郎中張儁等累刻方至太祖性本卞急因茲大怒並格殺于前墀

張儁字彥臣祖父咸有聞于時儁少孤自修飾善為五言詩其警

句頗爲人所稱唐廣明中黃巢犯京師天子幸蜀士皆竄伏窟穴以保其生僑亦晦跡浮泛不失其道及僖宗還京師由校書郎西畿尉登朝爲御史補闕起居郎司勳員外萬年縣令以事黜官峽中將十年太祖卽位用宰臣薛貽矩爲鹽鐵使僑與貽矩同年登第甚知其才卽奏爲鹽鐵判官遷秩爲禮部郎中兼職如故乾化二年二月扈從後至與孫隲張衍同日遇禍于白馬頓

張衍字元用河南尹魏王宗爽之猶子也其父死于兵間衍樂讀書爲儒始以經學就舉不中選時諫議大夫鄭徽退居洛陽以女妻之遂令應辭科不數上登第唐昭宗東遷以宗爽勳力隆峻衍由校書郎拜左拾遺旋召爲翰林學士太祖卽位罷之特拜考功郎中俄遷右諫議大夫衍巧生業樂積聚太祖將北伐頗以扈從間糜耗力用繫意屢干託宰執求免是行太祖微聞之又屬應召

稽晚與孫隲等同日遇禍

杜荀鶴池州人辛父房唐才子傳荀鶴字彥之收之微子也善爲詩辭句切理爲時所許旣擢

第復還舊山唐才子傳荀鶴嘗謁梁王朱全忠與之坐忽無雲而雨王以爲天泣不祥命作詩稱意王喜之荀鶴與進連敗文場甚苦至是送春官大順二年裴贄侍郎放

第八人登科正月十日放榜正荀鶴生朝也王希羽獻詩曰金榜曉懸生世日玉書潛記上昇時九華山色高千尺未必高于第八枝又唐新纂云荀鶴舉進士及第東歸過夷門獻梁太祖詩句云四海九州空第一不同諸鎮府封王是則荀鶴之受知于梁祖舊矣不待田頔之箋問而始被遇也時田頔在宣州甚重之頔將

起兵乃陰令以箋問至太祖遇之頗厚及頔遇禍太祖以其才表之尋授翰林學士主客員外郎旣而恃太祖之勢凡搢紳間已所不悅者日屈指怒數將謀盡殺之苞蓄未及洩丁重疾旬日而卒羅隱唐才子傳隱字昭諫餘杭人詩名于天下尤長于詠史然多所譏諷以故不中第大爲唐宰相鄭畋李蔚所知隱雖負文稱然貌古而陋畋女幼有文性嘗覽隱詩卷諷誦不已畋疑其女有慕才之意一日隱至第鄭女垂簾而窺之自是絕不詠其詩唐廣明中因亂歸鄉

里節度使錢鏐辟為從事開平初太祖以右諫議大夫徵不至魏博節度使羅紹威密表推薦乃授給事中年八十餘終于錢塘澗

日記云唐光啓三年吳越王表奏為錢塘令遷著作郎辟掌書記天祐三年充判官梁開平二年授給事中三年遷發運使是年卒葬于定山鄉金部郎中沈崧銘其墓有文集

數卷行于世唐才子傳云隱所著讒書詭本淮海寓言湘南應用集甲乙集外集落事等並安有羅尊師者深于相術隱以貌陋恐為相術所棄每與尊師接談常自大以沮之及其累遭黜落不得已始往問焉尊師笑曰貧道知之久矣但以吾子決在第一第未可與語今日之事貧道敢有所隱乎且吾子之于一第也貧道觀之雖首冠羣英亦不過簿尉爾若能罷舉東歸霸國以求用則必富且貴矣兩途吾子宜自擇之隱情然不知所措者數日隣居有賣飯媪見隱驚曰何辭色之沮喪如此莫有不決之事否隱謂知之因盡以尊師之言告之媪歎曰秀才何自迷甚焉且天下皆知羅隱何須一第然後為得哉不知急取富貴則老漢之願也隱聞之釋然遂歸錢塘時錢鏐方得兩浙置之幕府使典軍中書檄其後官給事中初隱罷上中書之日費寤因抵魏謁鄴王羅紹威將入其境先貽書敘其家世鄴王為姪幕府僚吏見其書皆怒曰羅隱一布衣爾而姪視大王其可乎紹威素重士且曰羅隱名振天下王公大人多為所薄今惠然肯顧其何以勝得在姪行為幸多矣敢不致恭諸公慎勿言于是擁旆郊迎一見即拜隱亦不讓及將行紹威贈以百萬他物稱是仍致書

于鏐謂叔父鏐首用之

仇殷不知何郡人也開平中仕至欽天監明于象緯歷數藝術精密近無其比光化中太祖在滑密遣王友倫以兵三萬禦幽州之

師十餘萬深慮其不敵召殷問曰陣可行乎曰其十四日過禺中乎又問之曰賊敗塗地又曰既望當見捷書果如其言不失晷刻太祖之在長蘆也諸將請攻壁號令軍中人負藁二圍寘于積俄而雲集殷曰何用或以所謀告之殷曰我占矣不見攻壁象無乃自退乎翼日有馳騎報丁會以潞州叛太祖令盡焚其藁而還不克攻開平中殷一日朝罷過崇政院使敬翔直閣翔問之曰月犯房次星其逼若綴是何祥也曰常度耳殷欲不言既過數步自度不可默乃反言曰三兩日當有不順語至無或驟恐宜先白上知既二日陝府奏同州劉知俊閉關作叛初王景仁之出師也殷上言太陰虧不利深入太祖遽遣使止之已敗于柏鄉矣殷所見觸類如是不可備錄然而畏慎特甚居常寢默未嘗敢顯言縱言事蹟惟其語音不可盡曉以故屢貽責罰後卒于官

段深不知何許人開平中以善醫待詔于翰林時太祖抱病久之其洩甚濁僧曉微侍藥有微賜紫衣師號錫賚甚厚頃之疾發曉微剝服色去師號因召深問曰疾愈復作草藥不足恃也我左右粒石而效者衆矣服之如何深對曰臣嘗奉詔診切陛下積憂勤失調護脈代耗而心益虛臣以爲宜先治心心和平而洩變清當進飲劑而不當粒石也臣謹按太倉公傳曰中熱不洩者不可服石石性精悍有大毒凡餌毒藥如甲兵不得已而用之非有危殆不可服也太祖善之令進飲劑疾稍愈乃以幣帛賜之

五代史卷二十四

五代史卷二十四攷證

梁書列傳十四李琕傳河南有外黃小黃 小黃歐陽史作下黃

攷困學紀聞云五代通錄李琕曰河南有外黃小黃漢地理志

陳畱有外黃小黃縣五代史記改小黃爲下黃誤也當從通錄

秦有外黃都尉 都尉原本作郡尉今據漢書地理志及歐陽史

改正

充侍講學士 案歐陽史作侍講

盧曾傳始爲齊州防禦使朱瓊從事 案新唐書通錄與是書梁

紀皆稱朱瓊爲齊州刺史惟此傳作防禦使疑有舛誤

孫隲傳並格殺于前墀 案通鑑攷異引梁實錄作闕死通鑑作

撲殺于前墀

杜荀鶴傳旬日而卒 案唐才子傳荀鶴以天祐元年卒北夢瑣

